

Iluarsiissut

Matumani akkissuteqaat 12. Oktober 2018-imeersoq taarserneqarpoq

(Kalaallisut oqaaseqatigiit immikkoortoq 4-mi ilai allangortinneqarput, isumaalli allannguuteqanngillat)

Nappaatit suut napparsimasut sivikitsumik piffissamiluunniit aalajangersimasumik sivilissusiligaanngitsumi Danmarkiliarlutik katsorsartikkiartortariaqalernerannik kinguneqartarnersut pillugit Naalackersuisut UPA2019-mi nassuiaammik saqqummiussinissaat pillugu Inatsisartunut aalajangiiffigisassatut siunnersuut. Nassuiaammi aningaasatigut nakorsaanikkullu periarfissat suut ungasinnerusoq isigalugu napparsimanik Danmarkimut katsorsartikkiartortunik ikilisitsisinnaasut ilanngunneqassapput.

(Inatsisartunut ilaasortaq Aqqaluaq B. Egede, Inuit Ataqatigiit)

Akissuteqaat

(Peqqissutsimut, Isumaginninnermut Inatsisinillu Atuutsitsinnermut Naalackersuisoq)

Siullermeerneqarnera

Inatsisartunut ilaasortaq Aqqaluaq B. Egede, Inuit Ataqatigiit, nappaatit suut pissutigalugit napparsimasut Danmarkimut katsorsartikkiartortariaqartartut pillugit nalunaarusiortoqarnissaanik kiisalu siunissaq ungasinnerusoq eqqarsaatigalugu napparsimasut Danmarkimut katsorsartikkiartortartut ikilisinneqarnissaat anguniarlugu aningaasaqarnikkut nakorsaanikkullu periarfissanik allaatiginnittoqarnissaanik aalajangiassatut siunnersuuteqarmat Naalackersuisut qutsavigerusuppaat.

Ilumoorpoq Peqqinnissaqarfik nunatsinni inuuniarnermi atugassarititaasunut annertuumik sunniuteqartartoq, kissaatigineqarporlu siunissami napparsimasut sapinngisamik amerlanerpaat Nunatsinni pisariaqartumik peqqissutsikkut sullinneqarsinnaalernissaat.

Peqqinnissaqarfiup ukiuni kingullerni nappaatinik misissuinerup, katsorsaanerup nakkutiginninnerullu nunani allani ingerlanneqartartut tigusinnaat sulissutigiuarsimavaa. Peqqinnissaqarfiup peqqissutsikkut sullissinerit tigusinnaannut periarfissat, aningaasaqarnikkut, sulisoqarnikkut inissaqarnikkullu sinaakkutaasut iluanni periarfissaqartinneqarpata, misissortuassavai.

Peqqinnissaqarfik ullumikkut ilaatigut sulisussarsiornikkut sulisunillu aalaakkaatitsinikkut assut unamminiagaqarpoq, tamannalu pissutigalugu immikkorluinnaq ittumik paasisimasallit sulisussarsiarnissaat sapernarpoq. Napparsimasut amerlannginnerat pissutigalugu unamminiarnartut taakku annertunerulerput, immikkorluinnarmi paasisimasallit piffissaq tamaat atorfeqartinnissaannut amerlanertigut tunngavissaqarsinnaaneq ajornakusoorluni. Susassaqarfiit immikkut ittut arlallit tiguniaraanni, kingunerisinnaavaa innuttaasut maannamut pitsaasumik sullinneqarnerat nunani allani immikkut ittumik katsorsaanerup ingerlanneqarneratut qaffasitsigisinnaajunnaarsinnaammat.

Aatsaat isumalluutit atorlugit, assersuutigalugu ilinniagaqassusermut naapertuuttumik naammaginarumik katsorsaasoqarsinnaalerlunilu nakkutiginnittoqarsinnaalerpat, peqqinnissaqarfinni sullissinerit immikkorluinnaq ittut tiguneqarnissaat pingaaruteqarluinnarpoq. Taamaattumik siunissaq ungasinnerusoq eqqarsaatigalugu nunani allani peqqissutsikkut sullissinerit amerlanerit tigunissaannut atatillugu aningaasaqarnikkut kingunerisassat nakorsaanikkullu periarfissat pillugit peqqissaartumik nassuiaasiornissaq pingaaruteqarpoq. Tamanna peqqissutsikkut sullissinerit siunissami tiguneqartussat pillugit piviusorsiorlumik pilersaarusiornissamut qulakkeerinneqataassaaq.

Taamaattumik Aqqaluaq B. Egedep siunnersuutaa imatut allannguutitut siunnersuusiorfigineqassasoq siunnersuutigaa:

Nappaatit suut napparsimasut sivikitsumik piffissamiluunniit aalajangersimasumik sivilissusiligaanngitsumi Danmarkiliarlutik katsorsartikkiartortariaqalertanerannik kinguneqartarnersut pillugit Naalakkersuisut **UKA2019**-mi nassuiaammik saqqummiussinissaat pillugu Inatsisartunut aalajangiiffigisassatut siunnersuut. Nassuiaammi aningaasatigut nakorsaanikkullu periarfissat suut ungasinnerusoq isigalugu napparsimasunik Danmarkimut katsorsartikkiartortunik ikilisitsisinnaasut ilanngunneqassapput.